

## Die groß Flerschemer Glock

De Karl hott omm Sunndaach omm Stommdisch gefroochd: Habbderrs geheerd, omm iwwernächsde Freidaach werrd e nei Glocke ferr de Torm vunn de Galluskersch gegosse unn die werrd 90 Zentner wiesche.

Seet de Schorsch: Dess iss e mords Sach, su e groß Glock ze gieße, koo Wunner, dass enn Haufe Flerschemer mett in die Gießerei fahrn, die wolle sich die Sach oogugge. Die Äldere, die doo mettfahrn, die werrn sich donn aach droo erinnern, dass in de Schul dem Schiller soi „Lied von der Glocke“ hawwe auswennisch lerne misse, genau wie mir. No ja, vill waaß isch joo nitt mieh defoo, awwer de Oofong, den krieh isch noch hie:

*Fest gemauert in der Erden  
steht die Form, aus Lehm gebrannt  
heute muss die Glocke werden  
frisch Gesellen, seid zur Hand.  
Von der Stirne heiß  
rinnen muss der Schweiß,  
soll das Werk den Meister loben,  
doch der Segen kommt von oben.*

Isch saach: Unn dess oone unn onnere wisse merr aach noch vunn dem Schiller soim Gedicht unn duns aach ab zu verwenne:

*Da werden Weiber zu Hyänen  
und treiben mit Entsetzen Scherz.*

De Karl druff: Ja, dess dut stimme, unn wenn isch ewe die Noochrischde gugge due, donn fällt merr immer oi:

*Jedoch der schrecklichste der Schrecken  
das ist der Mensch in seinem Wahn.*

De Schiller, hott de Schorsch gesaad, der hott halt nitt nor beschriwwe, wie su e Glock gegosse werrd, naa, der hott aach beschriwwe, wie die Mensche doomols warn. Unn mir wisse, wie se heit noch sinn, weil sich nix geännerd hott onn Mord unn Todschlaach. Isch habb gemoond: Awwer dess End vunn dem Gedicht kenne merr aach noch unn villeischd solle merr e bissi doo droo glaawe:

*Ziehet, ziehet, hebt!  
sie bewegt sich, schwebt,  
Freude dieser Stadt bedeute,  
Friede sei ihr erst Geläute.*

De Karl hott gegrinst: Die Flerschemer derrfe halt nor nitt vergesse, enn Klöppel in die Glock ze hänge, den hott de Schiller in soim Gedicht nämlich vergesse.

Eiern Honnes